

四庫全書

集部

欽定四庫全書

集部  
霞外詩集卷二

詳校官中書臣李彤

侍讀臣孫球覆勘

覆校官中書臣朱鈐

校對官典簿臣劉景岳

謄錄監生臣龔輝遠

欽定四庫全書

集部五

霞外詩集

別集類四元

提要

臣等謹按霞外詩集十卷元道士馬臻撰臻字志道號虛中錢塘人仇遠序是集稱其隱約西湖之濱士大夫慕與之交不過習清虛談淡泊無一言及勢力聲利龔開序則稱大德辛丑嗣天師張真人如燕主行內醮玄教

名流並翼然景從王子繇馬志道在焉其人  
蓋在通介之間者也集中鋪張富貴數篇如  
嗣天師吳真人詩之類頗乖山林之格然所  
作皆神骨秀騫風力道上琅琅有金石之音  
雖不能具金翅擘海香象渡河之力而亦不  
類酸寒細碎蟲吟草間觀其述懷一詩殆宋  
末遺老寄託黃冠而其豪逸俊邁之氣無所  
不可政不以枯寂恬淡為高耳此本為毛晉

所刻末有晉跋稱伯雨之後復有虛中今考  
諸家之序皆作於仁宗大德初年則臻尚在  
張雨前晉偶失檢也乾隆四十二年三月恭  
校上

總纂官臣紀昀臣陸錫熊臣孫士毅

總校官臣陸費墀



霞外詩集原序

錢塘有隱君子曰馬虛中其資也粹其學也正其言也  
文其居家篤於孝弟清勤恬雅動以古人自飭暨出家  
著道士服隱約西湖之濱士大夫慕與之交不過習清  
虛談淡泊無一言及勢力聲利而世之能寒熱人者爾  
爾我我進退語嘿之間一言不少屈蓋重內而簡外信  
己而不求人知而人之知者誠心說服焉噫君子哉予  
與虛中游有年平昔已敬其人一日虛中攜詩卷相示

大抵以平夷恬澹為體清新圓美為用陶衷于空合道  
于趣渾然天成不止於烟雲花草魚鳥而已鄉有雪巘  
褚先生者博學卓行之士也執古刀尺裁量晚後虛中  
從之學盡得其微妙况汗漫萬里遠覽崧岱之雄拔江  
河濟淮之奔放近挹兩峰三潭六橋之佳麗秀整交廣  
視濶胸次宏豁宜其筆力不凡如此昔人謂不行萬里  
不可讀杜詩而夔州以後殊更老成予於虛中之歸不  
但放一頭且畏之矣西湖物物是詩料秋來日日是詩



思尚當與子吟嘯于乾坤萬象之表大德六年九日里  
人仇遠序

大德辛丑嗣天師張真人如燕主行內醮玄教名流並  
翼然景從王子繇馬志道在焉明年來歸志道出往來  
吟卷及手畫桑乾龍門二圖僕幸得一見隨喜居頃之  
遂以所作霞外諸詩俾為之序僕既嘆羨有加因之又  
念雪巘翁極父師之教至此而玉其成且行卷所存多  
禮樂光華之典據後之君子錄名山故事尚於茲有攷

二者皆當表著而復計忖自車書混一南北通轅干名  
逐利者去來幾何人嘗試使之述周漢之遺跡大川喬  
岳之勢狀與城郭人民之今若古或者漫不知省必待  
詩人采掇歸之筆下如好音婢色動人觀聽一何異哉  
然後知先王之澤先民情性不逐有形而弊而事事物  
物見之聲文氣韻萬古可一息辨也合是為序要非竅  
言抑孝友德履詩之根本也志道寧親於家庭甘旨如  
意領弟於精廬意愛無數交往朋從久敬弗替而於僕

也又以翰墨遊戲相與無間其何說之詞為詩若干首  
古今體製具在而馴雅如其人覽者自見淮陰龔開聖  
予序



欽定四庫全書

霞外詩集卷一

元馬臻撰

春霽書懷

紛雨洗游塵潤物亦已足淑氣浮芳鮮山澤一時綠回  
鴈遠零亂流雲高斷續伊余愜所向偶景相穆穆好鳥  
如含情不語立嘉木靜知春事佳老覺世味熟遂展平生  
情誰復辨蕉鹿

五雲山寫望

少乏超絕姿瘦鶴存野格乾坤心自放頗覺塵土窄安  
得千金橐使我窮地脈征途多荆榛此志寧復得今晨  
躋山顛納納瞰廣陌正東臨大江髣髴海外國孤帆揚  
長風靜入秋氣白層巒引列嶂下有雲霧隔不知誰家  
樓突兀立遠色禹穴指顧外厯厯禾黍黑簸蕩千古愁  
人世一過客高歌據苔石坐見日車反目極窮冥搜一  
鴈沒空碧

山中早梅

孤根徹后土破冷爭春回惜哉冰雪姿落此荆榛隈若  
生白玉堂不負黃金壘一見一惆悵再歌再徘徊未央  
宮中花直待羯鼓催

遣興二首

長日閉門坐軒車誰與親鶯花欺白首鮭菜足青春今  
古斯文在江湖舊業貧丹心不可道風雨夜來頻

老木蒼蒼合幽禽瑣瑣喧坐長樓轉影靜極客忘言雲  
物何時定亭臺幾處存虛懷推至理隨意且芳樽

竹窗

竹窗西日晚來明  
桂子香中鶴夢清  
侍立小童閒不動  
蕭蕭石鼎煮茶聲

題墨竹

拂雲標格歲寒心  
墨色分陰重又輕  
不似渭川千畝綠  
只和風雨作秋聲

雪夜仇仁近屠存博數先輩過山房分韻得朝字  
溼雲結空寒氣驕雲根古觀埋山腰山人宴坐觀物化



竹風松雪聲飄蕭二三才子相招邀  
聯軒過我歡清宵  
小閣閉暖蠟光搖  
案頭置酒羅桂椒  
劇談若與元氣合  
銅匱火冷青煙消  
城樓殘更敲短夢  
鼾眠縱客嘲邊韶  
我無詩才學李杜  
又無仙術追松喬  
人生此會能有幾  
今朝未必知來朝  
請君得意歌且飲  
江上春風吹柳條

偶成

昔嫌上界多官府  
不道人間足是非  
四十年來悲喜夢  
倚欄閒看柳花飛

詩愁

城中親舊渾零落湖上園林幾變更只有詩愁消不盡  
旋隨芳草眼前生

春日幽居

淺淺春風尚帶寒日斜香篆半燒殘杏花一樹開如錦  
怕觸啼鶯不倚闌

春雨

良會時不偶徒為物所嬰驚雷啟羣動有鳥遷喬鳴徙

倚流遠日瀾瀾川去平風色誤花信春光消雨聲念此  
睽心賞取榼聊自傾幾微存倚伏茲理何冥冥孰能繼  
高唱欲罷難忘情

寄題終南山甘河鎮遇仙宮

七真遇呂  
公傳道處

秋空劍別洞庭波道本忘言又若何人事百年迷苦海  
仙源一脈會甘河金蓮既秀真無待玄理雖深語不多  
惆悵終南笙鶴遠五雲宮闕自嵯峨

湖中春遊曲

堂堂復堂堂畫鷁誰家郎繡旌鴛頸冷膳府鸞刀光傾  
椒注桂邀流芳楚腰絡索聞懸璫瑩篴急響如相惱岸  
頭折盡忘憂草黃金慣積自媒身隨肩滿席惟嗔老牙  
籤萬軸齒不拈孟客何賓跡如掃柳綿撲撲乘風吹花  
翎小鳥啼訴誰玉郎沉醉晚未醒春光去矣猶不知

白鷺

吟肩高聳受風吹西塞山邊細雨時不染丹青愁鶴妬  
自矜清白見鷗欺某丘有樹猶堪宿何處無魚可療飢

振振飛來應得意也曾物色到周詩

為葛元白賦閑境

大觀均喧寂結廬在人境所以葛天民妙處心自領靜  
者非有期物役敢馳騁有時絃歌聲清絕百慮屏坐久  
白日動厯亂竹木影翻笑龐德公深向鹿門隱山林野  
客如龜藏造次數上君子堂先生高卧北窗下曲肱一  
覺回羲皇門前參錯自車馬黃塵烏帽春茫茫春茫茫  
日欲老中有青天白雲落花芳草夢回不記邯鄲道

危坐

危坐不覺久月照一庭綠三更白露下夜氣溼野服恬  
淡失悲喜視聽非耳目閒將黃庭經更趁月下讀

越中言懷

分甘茅屋老蒼苔不是明時棄不才避社燕歸楊柳合  
趁虛人散鷺鷥來半江落日明漁浦兩岼回潮掠釣臺  
吳越爭雄俱一夢年年杜若滿汀開

遊雷峰寺

雷峰壯南屏，窳堵林外出。老僧舊識面，邀我一登陟。高  
回星漢流，靜壓山水碧。晝有白雲飛，夜有明月入。諸佛  
似安禪，脈脈度朝夕。野人怯高險，欲上股先慄。不如履  
平地，彼此無得失。

初春即事

東風又到武林城，靜裏看春各有情。怕說利名多晝睡，  
愛尋山水每閒行。傍人冷笑營巢燕，求友翻憐出谷鶯。  
世事不窮時易失，翠微深處夕陽明。

二禽篇

杜鵑杜鵑聞爾曾為蜀天子一自城荒爾身死當年御  
極日萬幾何苦今朝自如此恭聞太上垂玄言治大國  
兮烹小鮮流情縱逸不追悔無端却恨春山烟毛衣縷  
縷滿身黑萬里岷峨歸不得六合茫茫啼一聲春風為  
爾無顏色

鷓鴣鷓鴣不知春色何負汝每到春來聲更苦百年不  
得此身安尚憶當時在行旅爾不學大鵬一舉培風兩



翼如雲垂又不學籬邊斥鷃翱翔飛躍蓬蒿枝黃陵廟  
前幾春草空遺怨恨傳新詩江南二月煙花亂子子孫  
孫自呼喚說盡人間行路難淒風苦雨心腸斷

貴公子

麝沉灰暖瑞煙輕十二闌干轉畫屏翠袖閒調鸚鵡語  
牙牌分勝牡丹名半垂簾幙因春冷未放笙歌為宿醒  
颭颭流蘇風不定隔牆時送賣花聲

雪

冷逼街頭酒價高  
晚來風急更蕭騷  
青樓醉舞不歸去  
江上一蓑憐汝曹

送仲澤邢講師回汴梁

寒日照吳山  
北風吹汴水  
山水一望間  
客路二千里  
是時玄冬月  
飛光促短晷  
之子忽言邁  
孤舟送行李  
仰睇極空煙  
嘶鴻入幽耳  
人生難滿百  
會合良有幾  
四海非無交  
利害射如矢  
鸞鳳慕竹實  
雞蟲競糠粃  
悲哉道不同  
反為世所恥  
所以送君行  
感慨莫能已  
中條萬古青

旦暮白雲起何時來卜鄰結茅白雲裏

奉酬容齋徐廉使

魯國真儒惟一人魯國多士徒紛紜紫微列宿光熒熒  
竭來蘇彼南州民夫子之才難比數復使清時見伊呂  
一夜霜風動列城黔胥縮膽如飢鼠棠陰欲轉公事餘  
高堂晝永娛琴書千村萬落雞犬靜山民野婦安樵漁  
昨朝來過幽人屋疊疊玄談唾珠玉他日重期掃石床  
為啜山茶薦秋菊

吳江夜泊

不見天隨子令人逸興孤  
村砧聲自荅岸鳥語相呼  
河漢回西極星辰入太湖  
古情吟不盡明月照姑蘇

宮怨

多愁多怨怕春天  
花外時聞警蹕傳  
金縷繡衣渾不稱  
餘香猶帶御爐煙

釋宮怨

萬頃恩波一寸心  
玉階青草斷車聲  
文章近日無人愛

休把黃金乞長卿

張野泉偕虛谷方便君趙春洲數先輩見訪即席

賦詩各以酒字為韻

幽居局青春水軒僅如斗敲門問誰來過我得良友浮  
雲無停陰霽色破古柳人生不自適歲月欺老醜欲挽  
湖水春添我盃中酒酒盡意不盡落日照魚笥掀髯出  
門去悲歡一何有

簡野泉兼呈同席諸公

黃河一清一千年天下何代無才賢  
蘭亭會散日已遠茂林修竹閒風煙  
西湖山水古竒絕佳句已屬峨岷仙  
我住湖邊六七載此跡雖滯心玄玄  
靜觀羣動趨變化敢與物態分媿妍  
不知門外春已晚游絲暖絮晴相牽  
每思古人去不返肝膽偈仄愁如懸  
誰言我輩異古昔賴有故人張野泉  
攜詩載酒忽扣戶須臾品饌羅其前  
座中羣彥皆詩伯侈靡齊梁不足律  
坐驅澆薄回大雅氣豪頗覺天地窄  
君家城東我城西一見忽憶數年隔

吁嗟歲月不待人况復此會難再得狂歌浪飲春亦驚  
剝水殘山晚蕭瑟酒闌客去竹木靜坐久稍已收衆色  
向來喧寂何所之蘧蘧夢破東方白

月下聞鶴

山對澄湖樓對山愛山終日倚樓看洞天何處鶴歸晚  
月下一聲風露寒

奉簡似山郭高士

仙翁仙島住應運下人寰讀易天心合論詩春思閒鐘

聲太一殿草色武林山應有推敲者月明來扣關

送郭似山回張公洞

春風吹沙春草長雜花媚煙飛野香幽華裊裊泣雨色  
人間光景勞中腸赤城老仙呼鶴起迢迢直度太湖水  
玉洞碧桃凝古芳玄扃窈窕羅疏綺吟詩贈別情相關  
霧節風幢幾日還歸來無語生幽寂啼鴂一聲春晝閒

題龍舟卷

樓船耀日青天轉容與中流棹歌遠漢武仙遊竟不還



汾陰幾度秋風晚至今流水愁無聲空令畫筆勞經營  
人間萬事等一笑雲淡天長千古情

無事

無事每日不出戶滿院松竹森交加晝眠厭聽啄木鳥  
早涼喜見牽牛花一真自可了生死萬事不必論等差  
誰能屑屑管迎送客來且試山中茶

瑞鶴詩上大宗師真人

皇皇古道尊三五雲從龍兮風從虎至尊垂拱四海寧

詔令昭事玄元祖維時羽服昕趨朝環珮參差肅儀矩  
大哉聖德合天心霓旌畫下胎仙舞初疑瑞雪飄晴空  
漸似雲衣來玉宇瑤壇春靜立多時碧落風清更延竚  
奇祥所致森有神閭闔門開又高舉是日天顏喜色動  
蕩蕩昉階儼千羽乃知無為無不為真化風行邁前古  
真人有道通杳冥力扶至教垂常名野人獻詩欣再拜  
山林自此陶休明上延景祚康黎民萬歲千秋歌太平  
龔聖子畫瘦馬行

在昔開元曹將軍健筆突兀老入神能貌明皇玉驄馬  
博得聲價輕千鈞後來韓幹只畫肉少陵不許肥失真  
寥寥此道幾懸絕至理不付尋常人淮陰龔公老儒者  
落筆文辭馳二雅有時快意掃骨馬妙處不在曹公下  
畫時想極虛無垠思入萬里沙場昏凝精洞視色不變  
杳冥之中百體存相經合備渥洼種仰首鳴天鼻欲動  
氣豪似與神龍爭疾雷迅雷驚塵夢憶昨嫖姚騎戰時  
旋雲轉霧飛四蹄翻然踏碎關山雪歸來汗血光淋漓

金匱要略卷一  
霜枯萬骨功誰利太平總為將軍致如今哀瘦箭瘢乾  
生駒却受黃金轡此馬此畫絕世無先生慷慨傳此圖  
可憐韋諷日已遠獨撫此畫深嗟吁北風動地天色慘  
展開猛士寒搖膽詠罷新詩無限情卷向空齋白日晚  
夜坐

空山高寒雲不凝綿綿夜坐神宇清泥丸朝退月露滴  
但聽下方雞犬聲

贈雲屋瑞上人

曾擊鳴鞘羽衛前毳袍錫杖且隨緣  
田園賣盡思行脚  
師友參多學坐禪  
聞說升平猶淚下  
因傷老大自心憐  
回頭好趁歸時路  
不見人牛月正圓

摘園橘寄戴祖禹

幽園逼湖水闢地種嘉橘  
時雨既霑濡培養藉春力  
憶昨開小花清陰正繁密  
疎簾白日靜香氣散書帙  
邇來八九月喜見纍纍實  
因思造化功具此霜露質  
張華吟未工  
慧老畫不出  
大者發至精  
錯落金相射  
小者凝元

氣低垂綴寒碧山鬼亦見避老鳥不敢喫昨朝喚山童  
提筐事採拾落刃綠霧飛入手流脂溼我恐殄天物精  
爽颯如失遙憐洞庭山萬樹風雨夕焉能飽一看路遠  
不可即須臾遶行廊吟詠意方釋童僕不好事笑我太  
迂僻為君薦樽罍聊復慰相憶

項王

叱咤猶傳數里驚陰陵失道已沾巾江東父老羞相見  
忍可捐軀遺故人

弔崔雲山

埃風蕩天荒孤山卧秋草君家孤山下不厭孤山好昔  
我山中房識君師侍傍白髮映蕉水紗語回羲皇聞君  
又絕粒默默宴華室道畢合神風回車朝帝一制魔誠  
所難有身良可嘆層陰翳太景平陸翻狂瀾憶君出門  
去相看淚如雨始欣天道還逸駕倏飄舉有詩君莫吟  
有酒君莫斟神交動恍惚尚想聞空音我歌山日落松  
聲起寥廓魂兮其有知為我來冥漠幽室苦夜長思君

念春陽春陽難復見短歌不成章

述懷

家無負郭田何以懷歸耕豈不有他好復恐勞其生窮  
居四十年富貴浮雲輕乳鳥喧高枝壯心忽然驚所憂  
聞道晚德業將無成言此向知己欲語已忘情

送郝景文闕之京

江上草已碧送君傷別心聽雞臨曉色策馬度春陰驛  
路燕山遠風花漢水深道人無外事林下問除音



送孫大方講師回汴梁朝元宮

遊遍江南山水地  
仙翁歸興動旌旄  
青溪人去鶴聲怨  
碧落風清劍氣高  
驛路野花心獨遠  
江鄉夜月夢應勞  
到家想得春風晚  
開盡玄都觀裏桃

山人

山人行止在山林  
生怕侯門說姓名  
蟲臂鼠肝分得失  
奴顏婢膝事逢迎  
一聲啼鳥湖煙暝  
滿地落花春雨晴  
自煮新茶試新火  
坐看斜日轉窗明

送姬講師回京

冷雨逼古春春華溼蒼翠生意老不化節物為憔悴悠  
悠山川長念子之何地臨岐各慘淡草草叙別意達人  
不患貧貞女不事媚至道貴冲漠澹然有深致後會殊  
未期願君勉斯志

聞杜宇

飄泊身同泛梗萍年年因爾更關情半啼半哭深含恨  
飛去飛來不住聲日落遠憐行客過風微聞見落花驚

故家喬木彫零盡一夜月明芳草生

步虛詞

逸轡太景阿蕭蕭導玄鈞虛節合萬奏高會冥五神陰  
陽鼓靈風一炁無不均淡然眇至寂大道無疎親適路  
非有待上仙齊飛輪哀哉貴終道塵波淪肉人丘垤祕  
濁骨大夜難希晨靈明喪愆穢繾綣來去因何不散爾  
想復此空中真虛舟縱風柁放浪無涯津期劫倏忽周  
真空浩無垠卓然吾獨存會當哂靈椿

看春

西湖二月春風豪  
蒲芽一日三寸高  
憑軒不語笑桃李  
施朱點白真徒勞

春日寫望

遠山重疊限空明  
淡拂生綃絕點塵  
半舸夕陽喧酒客  
一樓寒色倚詩人  
早鶯懷舊隨時至  
芳草無情著處新  
却憶城中有貧者  
杏花開盡不知春

山中寒食

青陽轉節候雜芳麗原隰山中寒食近啼鳩亦已急新  
塚有人祭古墓無人泣傷心名利骨瑟瑟土花溼石馬  
悲無聲空對東風立

春霽陪葛元白游南山

積雨淹幽事初晴得此晨問舟尋上客放步約同人偶  
入招提境如酬宿昔因禪心本無住吾道豈憂貧城郭  
千年鶴林丘一聚塵歡娛時不偶激越意空陳路改疑  
前夢雲孤憶老親彈琴僧舍晚覓句酒家春閒水文輕

穀平蕪展細茵目驚流節駛心醉古風淳久識窮非鬼  
難言筆有神感深將下涕喜極欲忘身蹭蹬繁花老陰  
沉亂葉新野夫元懶放杜宇足酸辛更欲東蒙隱難期  
北郭隣有懷聊自適愧爾葛天民

喜晴

久雨山水暗荒雞鳴膠膠貧居匪琴書何以勝寂寥今  
晨戶牖白天宇回光昭日華引生意衆卉綠寒條浮陰  
滅餘迹遠遠帶六橋蜂聲遶樹轉水影和春搖豈不展

好懷潤我顏色凋床頭濁醪熟清士亦可招俯仰已陳迹疇能計明朝

田家

地偏生事僻轉覺入城遙犬吠三叉路人行獨木橋炊煙時滅沒村酒自招邀昨日蠶新浴桑桑綠滿條

姑蘇逢鄧覺非

春夏忽已交放舟別吾廬計日念行邁薄言寓姑蘇出門無所從桑麻藹丘墟與君敦夙好邂逅臨長衢指我

屋頭柳高陰正扶蘇一室無長物清心有琴書洗觴酌  
醇酎呼童摘畦蔬乃知天壤間靜者樂有餘名者實之  
賓此語真不虛

熱

盛夏勢莫當昊天日亭午亢陽流赤光崇岡裂焦土夸  
父不知疲暍死自摧苦何不挽滄溟大需天下雨

寄越上友人

分袂沙邊兩歲餘生涯別後竟何如雲迷禹穴無來信



秋隔吳山有故居，思斷碧天江漠漠。  
吟低白日雨疎疎，郊墟昨夜新涼入。  
珍重佳兒好讀書。

和陳無逸見寄詩韻

感君高誼魯傾蓋，豈意今朝辱贈詩。  
健筆驚人秋浩蕩，流年傷我老差池。  
論文每恨識不早，題橘徒能寄所思。  
便欲相期賦招隱，計疎難辦買山資。

身世

身世寄悠悠，閒門寂似秋。  
時清孤劍化，齒落萬緣休。  
歌

枕日下樹捲簾雲入樓近來添薜荔生滿屋山頭

中秋見月

去年中秋月團團上林藪文士兩三人竟夕坐相守精  
光浮白空誰見蝦蟇醜觴酌雜歌吟待得下高柳今年  
中秋月輝輝入窗牖照我如有期怪我樽無酒月是去  
年月不復去年友人生如風花聚散良不偶賢愚與貴  
賤肉骨同一朽我今見明月再拜復稽首側聞古老言  
此言豈虛有正秋三五滿萬里絕纖垢玉兔搗神藥服

之壽長久我無周生術安得月在手天梯邈難攀中局  
欲成疾萬方浩漫漫月輪又西走

秋日山家

落葉不肯住堦前知幾重飢禽窺綻栗危石俯喬松日  
午客初到路迷雲更封何時了塵事卜築肯相容

為張仲美畫夢元遺山雪夜論詩圖

虐焰焦玄根古道日淪墜安知大化中元氣塞天地遺  
山與仲美先後本一揆上士以神契冥冥感靈會長淮

金匱要略卷一  
夜風雪清夢短繁對玄趣非名言豈索形骸外煌煌三百篇光焰高百世曰予託人境塵土觸肝肺苦吟愧蠅鳴况復事粉繪諸公足題品靡靡發真祕持此寄遠心江漢已秋意中有號風蟬哀哀響寒翠

存此山寄清游藁

秋風杖錫別多年細讀新詩盡極玄却憶姑蘇雲外寺月明誰伴夜深禪

秋日即事

芙蓉涼淺未全紅  
稚子攔街鬪草蟲  
節物變遷風景在  
故園心事不言中

秋懷

大火徂秋節  
炎炎幾何時  
今日昧明日  
敢作百歲期  
涼風昨夜來  
西山白雲起  
舟人吹鷓鴣  
愁蕩一湖水  
嗟余寡所見  
就失玄髮歡  
獨坐待明月  
恨入青雲端  
自古賢達人  
誰獨免其死  
靜言求此理  
如此復如此  
呼童買美酒  
趁月傾樽罍  
雖然不解飲  
聊復暢此懷

題日觀蒲萄卷

老衲搏空無混沌為之闢拔得天地根不假雨露力寒  
藤挂鬼眼累累冷光碧驪龍亦驚猜夜半風霆急

排悶

諳盡時情薄似煙更憑誰覓買山錢催涼雨久添秋恨  
待客茶頻發夜眠身退每蒙先達許詩成多得外人傳  
榮枯已悟須臾事一住湖邊又十年

涼夜

遺編掩罷又重披老去悠悠記性遲正是月沉燈半滅  
一園涼雨草蟲悲

蛺蝶

栩栩復翩翩迎風勢不前草根時點染花處自留連怕  
冷多尋日爭高欲上天誰家騃兒女相逐過橋邊

霞外詩集卷一



欽定四庫全書

霞外詩集卷二

元馬臻撰

前結交行

古交山上松青青色不改縱有霜雪侵節操固常在今  
交陌上花容貌相矜誇一朝風雨至飄泊隨泥沙陳雷  
管鮑世不有一貧一富難長久對面相看仰泰山下視  
羣峰皆培塿嗟來乎嗟來乎床頭黃金不可無君看金  
盡失顏色壯士灰心不丈夫

後結交行

古交皆結心其義能斷金今交皆結金倏忽能變心取  
舍既殊軌反掌生陸沉正平一朝忤黃祖有若將身投  
猛虎子桑莫逆忘其生乃能相與無相與古人今人皆  
足悲百年憂樂須臾期男兒節義死不變誰肯心懷未  
濟時嗚呼誰肯心懷未濟時

釋愁

去者不可追未來難強名二氣運昏曉萬物遂生成泰

山若為重鴻毛若為輕苟不任天命百慮徒營營杞人  
一何愚無事憂天傾

山平水遠圖

乾坤浩浩目力短山水帖帖空光連人家半在溪影裏  
萬里春風來客船

聞早鴈

初鴻有餘音老眼無遠光登樓望不極但見天青蒼朝  
飛秋日短算宿秋水長不知從此去早晚到衡陽衡陽

有故人書札不可將木末避矰繳雲邊足鷹揚中途多  
苦辛羽翮能無傷望爾三春歸依舊經吳鄉

送陳子振歸姑蘇

有序

予與子振識面屢閱歲矣一聚一散不復情親  
偶辱見寄壯游諸詩觀其辭追躅風雅遠邁前  
人不覺快然會心夫何鴈蕩片雲恨論交之不  
早繇是酬酢唱和無日而虛未幾又復言還嗟  
流景之易遷况良遇之不偶臨歧把袂故作詩

以錢之

平生每多湖海交論心屈指不可數男兒勲業無所成  
忽忽身年四十五日日欠詩如欠債冥搜豈憚物役苦  
晚歲始得鮑叔親一語當機合前古怡然示我壯遊篇  
長歌短歌逼杜甫凝神注意一展誦山鬼水怪亦起舞  
夜風索索湖水驚蟄龍銜珠不敢吐羨君傑立懷長才  
富貴終當拾芥取胡為掉頭不肯住束書又向何方去  
君往姑蘇我在杭後會焉能定相許季秋鴻鴈盡南征

江漢茫茫足風雨君若他時過環堵為君門前掃落花  
呼童厨中具雞黍君今別去相憶不

冬夜客至

故人終歲別寒夜此留連雪暗天窗月風回地竈煙鴈  
羣侵夜發漏點隔城傳話舊成愁絕相看復算年

歲夜自遣

坐見年殘竹爆中更將盃酒祝東風道人心事如灰久  
辜負燈花一穗紅

德清夜泊

遠色變昏晦卸帆依淺沙  
浪搜盤岸木風逆赴巢鴉  
細草官塘直長煙野日斜  
寒機聞夜織燈火是誰家

四聖觀寫望

西林橋畔畫船開一片簫韶水上來  
多少綠楊遮不住天風吹過小蓬萊

挽月湖陸尊師

浮雲無定迹倏忽變其常  
四序相馳逐安得人久長  
先

生負盛才早歲道彌昌我翁亦年壯瓢笠行相將煙霞  
結幽志矻矻窮老莊先生彈素琴一詠復一觴山川半  
杖屨逸氣橫天章醉袖拂萬象談笑輕侯王息肩城邑  
改兩鬢各已蒼我翁徵不起抱獨如龜藏先生善兼人  
持危振玄綱復來主玄都香火飯遐方功成身自退出  
處誠所當去歲冬風來木落千林霜我翁在白石鵬化  
思騰翔慟哭挽靈輓歸瘞湖山陽先生來會葬洒淚陟  
崇岡言別幾何時載見秋草黃遺書忽墮前顧盼憂且



惶死生猶夜旦此理不足傷所悲失父執澆風散靈芒  
哀多情不盡歷歷寫我腸我來弔詩魂再拜陳酒漿落  
日大江算孤舟度微茫愁猿向我啼驚浪為我揚思君  
望八極想像仙人房鶴唳九皋清一笑人間忙

書黃西有游塵藁後

茫茫大塊噫清氣調調刁刁聲各異詩老得之肝膽雄  
吐出毫芒照天地書齋晝對百慮空忽如沆瀣澆心胸  
簷頭癡燕並兩足細語不敢驚春風嗚呼涪翁去世久

一脈流芳到西有石床待月讀到明空山無人魑魅走  
擾擾

擾擾行塵應接勞絲來斥鷃樂蓬蒿胸中丘壑開圖畫  
霞外光陰託酒醪未必漢廷疎四皓至今吳地事三高  
功成便合謀身退纓纓春風正碧桃

春日言情兼懷同好

漢陰抱甕久忘機一事無成只布衣萬水千山人獨去  
三春二月燕雙歸哀顏暗改青銅鏡舊業依前白板扉

莫對落花思往事故交消息近來稀

墨梅

疎葩結冷光素質凝古色濡毫誰氏子巧奪真宰力展  
卷如有訴老兔向天泣髣髴月沉時影落參旗直夜久  
書燈青鴻飛楚天黑寒香忽破鼻幽意不可得悠悠感  
物理對此成太息我欲將贈遠真幻兩莫識長嘯臨春  
風春風浩無極

寄越上張仲美

十載萍蓬悵別離偶然一見又差池簿書官事何時了  
杖屨春風幾日隨俸薄不堪供鶴料才高長是贈人詩  
鏡湖波暖多回鴈好寄書來亦未遲

鄧牧心絕粒味道賦長句以贈

穀者命之本此語足深致四體不服勤何以望卒歲昏  
昏塵土喧疲役身口累食也苟失時飢火熱五內鄧君  
儒者仙久牧方寸地一朝遇至人玄言啟幽秘若非種  
杏翁定是赤松輩教以絕火粒咀嚼太和氣外美邪魔

腥八珍豈足貴虛無空中素俗物盡疣贅過我索詩章  
已覺神彩異丹髓碧華滋道大淡無味富家食方丈日  
計萬錢費庖丁技雖窮鸞刀厭瑣碎安知遺世士回幹  
太古意萬象一秋毫忘形日月外翻嗟鄭子真谷口躬  
耜耒會當謝塵氛飄舉賓軒帝

送鄒混無回邵武

萬里晴空一劍飛浙山尋勝阻幽期歸舟醉叱神龍護  
行篋笑看仙鶴隨椰子酒濃欺瘴霧木綿花發待春詩

隣家故老遙相接應問西湖話別時

黑白雲

落落出岫雲黑白分媼妍黑雲或成雨白雲空蔽天俗  
眼不見察俗意誰相憐美言傾人心中有千丈泉

春日閑居二首

滿院春陰半掩扉杏花猶怕曉寒欺  
蘚痕帶露侵基石山影分雲落硯池  
貧久家僮生去意社遲梁燕阻歸期  
詩成一餉無人說芳草連天寄與誰

數峰青處敞蕭齋。自斫楊枝傍水栽。問字無人攜酒去。  
消閒有客抱琴來。遙汀風急鷺雙起。古岸日斜花亂開。  
袞袞光陰堪一笑。城頭畫角為誰哀。

湖邊春思

西林花雨霽春氣。欲飛浮船過吹簫客。旗標賣酒樓暖。  
煙鶯自在遲日蝶。風流正是桑麻處。支筇認舊游。

子規

月冷聲聲在翠微。千華萬草失光輝。休言催得韶華去。

涪萬東川春也歸

游虎丘寺

野岸維行舟步此金沙地孤墪出雲杪衆木攢古意蹲  
虎今何之裂石浮劍氣俯仰成古今人生樂為貴所以  
高歌飲聊復慰身世

為方仲客作子晉吹笙扇兼賦詩寄意

昔君別桑梓彼此姿年芳音書兩莫致路遠徒相望暖  
風吹帆三百里闔閭城裏花如綺停車來扣故人家恍



然一見心驚喜問余別後今何之摩挲髭鬚已如此論  
文把酒還相親幽尋幾處隨芳塵荒林雜卉留餘春愁  
姿野氣空惱人劍池舊事惟明月大笑高歌醉中別歸  
來一卧吳山雲忽地西風下庭葉思君如江水迢迢不  
可忘我有尺素書魚鴈不得將却憶仙人王子晉月下  
吹笙向緱嶺仙人去世遠鶴亦竟不來為君寫入白團  
扇玉冠絳裳仙風道骨洒落何奇哉恍惚聽希聲於至  
寂一曲人間殊可哀獨坐長松下上有凌霄開此心隨

此畫遠寄姑蘇臺

海棠

殷紅含露卧朝寒疑是春工畫未乾  
底事詩人吟不穩直須燒燭夜深看

詩

六義闕風教吟須字字安苦心雕琢易出口  
渾成難道合天心動篇終鬼膽寒極玄言不得休作等閒看

烏夜啼

烏夜啼朝啼啼東方曰夜啼林影黑關河萬里天雨霜月  
冷夜長眠不得烏夜啼憐爾巢中黃口時哺腥吞腐羽  
毛長母子日日長追隨一旦離羣自成偶相呼相喚期  
相守故雄零落不復知留得孤雌住哀柳柳條蕭颯難  
棲身夢驚三月楊花春載飛載止情莫伸欲去不去愁  
殺人不知挾彈誰家子暴物傷生苦如此哀音散入江  
湖間老屋破窗燈欲死烏夜啼君豈知

送陳鍊師遊方

文章金玉有定價未測碧海青珊瑚浣花老翁久冥漠  
種桃道士誰招呼高風健鶻固有待舊水窮魚非自圖  
千里之行始足下道也不可離須臾

清明書懷

疎懶無堪見物情自裁詩句了清明閒庭芳草年年綠  
不為東風管送迎

春遊

園草浮青入杖藜莫教孤負好花時人生屈指頭如雪

消得春風幾首詩

送梁中砥歸句曲山

家住華陽第幾峰  
又將琴劍去匆匆  
地浮雲氣連山白  
露浴丹光入夜紅  
千里音塵隨斷鴈  
百年聚散類飛蓬  
吳頭楚尾關春恨  
盡在鶯聲柳色中

懷古

媧皇補天闕  
后土遂成寧  
化化者不化  
是為元化精  
先王官天下  
其政以結繩  
戰國事爭討  
四海森甲兵  
仲尼

既去魯老聃西出秦後世滋華僞機巧易其誠愚智互  
吞吐得失紛相仍邇來百千年一一垂空名白骨填恨  
土大風吹不平我生宇宙間短羽飛秋螢進寸而退尺  
聖人戒其盈披衣起中夕念此傷心情素月行廣漢明  
星流太清但覺晝夜轉不知人世更默坐觀天運萬壑  
回秋聲

送楊古性之淮海山長

嘉陵山水佳人物亦超邁楊君早讀書功名等拾芥仙

山基散桑海遷忽然邂逅西湖邊天網宏大四海一聖  
君宵旰憂黎元君今又師儒之官向京口京口足衣冠  
彬彬魯中叟輕裝三尺桐孤舟一樽酒相送各無言蟬  
聲在高柳知君此去佳政多羣才詩禮相研磨西風昨  
夜發廣野北固江頭吹白波吹白波為君吟別奈秋何

賣藥翁

山人本在山中住偶向城中賣藥去不道石潭龍出雲  
失却朝來下山處

題元暉小景

幾點歸鴉入暮煙  
漁簑和雨釣江天  
誰憐一片淋漓墨  
曾在米家書畫船

游仙詞

上清真人玉華仙  
夜策鸞輅凌珠煙  
罡風廣漠露華冷  
搖蕩金鈴聞半天  
路逢仙姥騎白鹿  
侍女雙雙散香玉  
遙看三島點神波  
恨入秋眉鏡中綠  
我自無為神自凝  
萬竅不動心冥冥  
靈君期我謁太帝  
下視濁海魚龍腥



玉虛煒煜明玄景羽葆搖搖入空影一曲雲和奏未終  
月輪已到崑崙頂

楊花

品題曾入百花名長恨濛濛畫不成灞岸雨餘粘穗溼  
章臺風暖撲人輕緩隨流水知無力閒度高樓似有情  
想得山齋清影裏亂和蛛網惹柴荆

毘陵客思

吾道已如此夜長眠不成雅歌傷白苧儒術誤青萍遠

漏斷復續殘燈滅又明  
身前身後事都上十年情

沙丘懷古

憑高懷古重依依  
秦駐山頭正落暉  
遼鶴信沉徐福去  
鮑魚風起祖龍歸  
固知倚伏存天道  
肯信強梁即禍機  
雲海微茫波浪惡  
一雙沙鳥傍船飛

放懷

出入韻

早悟身為累  
終期靜結廬  
一閒天不與  
半老地猶無  
籬菊陶彭澤  
畦蔬阮隱居  
誰能事拘束  
曳尾自泥途

蝶

曾隨秦女踏青陽，幾被鶯捎出建章。  
芳草夢寒迷碧色，杏花雨細宿紅香。  
粉凝薄翅春無力，恨入修眉晚斷腸。  
寄語莫尋歌舞處，五侯門第有高牆。

悼似山郭高士

高士之師王頤山乙亥歲浩歌終隱莫知所之故築亭曰待鶴

執手東風酒一卮，武林曾有贈行詩。  
迢迢夢想江湖濶，杳杳音塵歲月遲。  
待鶴不來空感恨，乘風歸去自堪悲。  
綸巾羽扇松陰下，猶記研朱點易時。

嘆落花

芳花麗白日脈脈如凝愁  
朝承清露滋莫逐長河流  
含和憶兒時轉眼成白頭  
欲見西王母披心訴其繇  
鶴從九天來聲落江湖秋  
濁骨如朽鐵安得從之遊

紛紛

紛紛寵辱暗消磨  
汶上魯聞嘆逝波  
利欲根心公論少  
是非私已嫉言多  
神傷涸轍魚相煦  
眼見權門雀可羅  
擬住南山餐白石  
不須扣角向人歌

讀五代史

五十年間遞吐吞  
龍爭虎鬪一消魂  
不如野老深山塚  
留得蒸嘗七世孫

信筆賦雜言招葛元白

湖邊春事空城裏  
渾未覺幽人嗒然卧  
強半不離藥有時  
自吟哦無事亦斟酌  
猶異爭馳名利場  
百年勝負基一著  
寒食清明去已遠  
可憐局促閒兩脚  
君不見成都杜陵老  
草堂破壞形枯槁  
典衣沽酒曲江頭  
蹇驢蹙蹙

尋花草青天白日眼不開俗子紛紛猶絕倒君早來君  
早來須判幾鞭青芒鞋好詩好酒消幾許忍使辜負繁  
花開振衣抖擻康衢埃莫教鷗鷺相驚猜與君靜看舟  
中醉客齊撫掌疾呼大叫舞三臺來不來幾字回

初夏

日下簾櫳午晝時黃庭讀罷篆煙遲虛齋靜極心無事  
卧看堦前樹影移

山行書所見

風吹桃李已成塵  
澗底幽花自晚春  
野廟蕭條門半掩  
樵夫折得獻山神

睡起

紅葵遶砌竹風涼  
睡起呼童上午香  
一帶粉牆平似紙  
閒研水墨畫瀟湘

宿石公房和韻

久憶南山寺  
春深始一行  
石靈將瀑冷  
僧好似詩清  
古壁蒲萄畫  
空林杜宇聲  
喚回湖海夢  
身世白鷗輕

王昭君圖

窈窕佳人絕代無一辭漢殿盡嗟吁丹青若恨毛延壽  
勾踐何功得破吳

寄友人

識君憐不早況復枉佳篇別去纔逾月思多似隔年亂  
田姑熟近平楚洞庭連想得門前柳清陰初有蟬

題高麗寺因上人房清淨觀

竹屋翠微裏開軒獨望時法身山色見佛眼世音知琴



寫僧傳譜牌懸客寄詩空塵侵不得心與白雲期

首夏

江南四月雨黃梅日日陰晴變百回又是一年農事急  
村村布穀正相催

挽鄒混無

將化之夕夢旌  
幢引回故里

問道師門鬢未彫偶因游學去家遙病深鶴骨無靈藥  
夢逐霓旌入古譙寒鴈隔雲書斷續孤兒扶櫬路蕭條  
心腸鐵石還淒愴泣把椒漿祖墓潮

贈隱者

蕭蕭隱者屋岼蓼入籬門木落涼煙薄魚行秋水渾  
居人忘爾汝沙鳥自兒孫却憶前時到梅花開正繁

山禽

我家衡門向山開山禽住久不相猜如今移家水邊住  
依舊山禽時復來

寄題碧淨軒

萬玉搖空軒亭亭護蒼翠勁色不受染脫略花柳氣有

時清風生一掃塵土翳客來淡無語盡日坐相對此是  
詩中禪莫作心境會

秋夜

眼空夜色秋滿城城樓漏鼓聞四更杓垂月轉萬山白  
坐看天河西北傾

聞鴈

知汝幾時到先令獨客聞雨昏低度屋風急亂穿雲衡  
岳路猶遠吳江夜正分如何傳素札為我弔湘君

卜居

人間無處不風波  
卜得幽居向薜蘿  
世事即今知夢少  
詩情從古自哀多  
高風老木山雄壯  
小雨枯荷水蕩摩  
隨分盤飧了朝暮  
陸機休賦百年歌

涼意

昨日涼氣吹衣裳  
牽牛已花青蔓牆  
百年生事秋淡薄  
一湖古意雲飛揚  
齊齊急艣投煙渡  
箇箇歸鴉顧夕陽  
各盡天公流轉意  
莫教懷抱謾悲傷

溪橋夜泊

風雨連天鴈過初暫停歸舸傍村墟忽然喚起少年思  
竹裏人家夜讀書

送龔聖予之姑蘇別業謁戎使君

每因送別憶前時淮海名流漸漸稀獨樹草堂工部老  
蒼苔茅屋廣文歸三峰有約期終隱五馬推賢莫謾違  
若遇天隨憑寄語布袍今擬換荷衣

卧疾

雙肩漸聳鬢毛垂不擬秋來病不離  
道友相過惟論藥  
醫人教勸莫吟詩每違勝事因多懶  
偶憶兒時益自悲  
歷歷百年多少事卧看風裊菊花枝

梅邊會飲寄葛禧巢

癡雲模糊欲釀雪湖上今朝北風正  
園林忽覺生意斷  
獨有孤根發清迴三花五蕊春已多  
況乃落漠被幽徑  
憶昔何遜在揚州月觀風臺動詩興  
後有孤山和靖翁  
留得高名寄香影禧巢愛梅復可憐  
每見花開輒吟詠

心胸磊落不受俗一笑樽空晚色靜巡簷動是隔歲期  
人事推移苦不定同心之言臭如蘭趁我鬚眉白未盡  
但願明年老身健更待梅花報春信

野宿

野宿投村舍褰衣度石砭隣雞喧算柵寒蟹上燈窗戍  
鼓凌雲擊城鐘入夜撞蕭蕭楓葉下鴈已過吳江

寶鏡

寶鏡存朗照夜室難為光幽蘭抱貞心不能傲嚴霜荆

玉未出璞豈畏雕琢傷和氏不解事則足徒罹殃昭昭  
天上日萬古鑒中腸

橫山道中

村舍喜留客相逢如故知  
槿籬垂橘柚溪艇賣鳧鷖  
斷港車魚早寒田穫稻遲時  
清民俗古野老亦言詩

傷存此山

號性常子

天台上何年別一住姑蘇  
僅十春緇衲典錢收古帖  
好詩憑客寄閒人悟來靈  
徹心多懶老去維摩病漸  
頻



真性常存元不昧  
隴頭石塔蘚痕新

侯門

侯門心不到幽事  
每相仍身向中年  
懶詩多遠客稱曉  
煙昏院落寒日上  
觚稜得句渾忘冷  
窗前曝硯冰

野梅

彫盡羣芳一樹奇  
傍山傍水最相宜  
如何慣守堅貞操  
不怕風霜怕笛吹

日暮

日昇登危峰下視江與湖霏霏暝色動風聲鼓天衢山  
川氣象大雲物自卷舒邈彼六合中海月如玄珠列宿  
轉天運陰陽旋六虛芸芸萬生根復歸混元初靈府一  
何靜廓落無所居妙極忽自哂欲言如有拘下士昧斯  
理白首空嗟吁

冬日寫望


久旱湖水落坐看山日西梅清如客對鷗冷似兒啼怕  
酒常先醉慵吟少著題游心與天遠無處覓端倪

寒夜有感

連宵風雨苦催寒吟對青燈夜向闌生事恰如蝸負殼  
入頭容易轉身難

除夜

竹爆聲殘燈燼垂坐聽更漏隔年期喜神宜向迎須早  
窮鬼難驅去任遲席上已無消夜果門前惟寫立春詩  
老夫記得承平事閒對兒曹說舊時



霞外詩集卷二

欽定四庫全書

集部  
霞外詩集卷四

詳校官中書臣李彤

侍讀臣孫球覆勘

覆校官中書臣朱鈐

校對官典簿臣劉景岳

謄錄監生臣龔輝遠

欽定四庫全書

霞外詩集卷三

元馬臻撰

題湘靈鼓瑟

沅湘水闊風蕭蕭  
水風敲珮天光搖  
為彈寶瑟傳幽悵  
一點柔紅瀉香露  
蒼梧恨鎖雲欲流  
湘花背日烘春愁  
人間有夢到不得  
仙山翠滑江浪黑

雨久江邊餞別

別意千重酒暫停  
放歌一曲向君聽  
家貧禮數多相失

雨久支干盡不靈古巷聚人祠櫟社算潮催客散樟亭  
孤帆又傍誰家宿遙見沙田燐火青

春雨

厭聽林鳩喚婦聲楚鄉梅柳一番春南鄰酒伴無多子  
細雨斜風故惱人

丹井

巾子峰頭嶺勢分西湖西畔近西村丹丸化去人通聖  
山運移來井自存香沁冷光消世味潤滋靈脈破雲根

空亭近日無題扁慚愧仙翁幾代孫

見柳詠懷

畫船曾繫柳邊橋歌舞升平樂意饒  
事去却憐橋畔柳春來猶學舞兒腰

寓意二首

原憲古達士被體衣如鶉抱道不苟得  
舉世誰其珍義士貴結客散金若沙塵  
富家重枯水不肯延閒人此理古不齊  
此風難復淳有氣干長虹縮頸不得伸  
蛙黷誠



無知眊眊喧青春

列子居鄭圃隱迹四十年自非將適衛詎識斯人賢含  
淳養天和遂發壺丘言長安豪俠兒寶馬黃金鞭身貴  
不讀書驕矜耀春妍志士若狗節簞瓢樂其全誰知化  
囿中夢蛇謾相憐魚目笑隋珠三復逍遙篇

奉簡盛元仁教授三首

表表師儒德業尊青衿弟子盡侯門何當經罷心無事  
作得新詩細與論

湖光山色助幽情  
琳宇無塵夕照明  
昨日鄰家聽更好  
步虛聲帶讀書聲

數株楊柳隔苔磯  
卜得蕭齋景更稀  
正是先生讀書處  
白鷗時復傍簷飛

新晴

新晴初試夾衣裳  
梅豆垂青小未嘗  
春色蕩搖鷓鴣恨  
煙光遮護牡丹香  
養生不去窗前草  
得句多題竹外牆  
心地太平風日好  
可憐岐路自羊腸

即事

地瘦仍慳雨  
桃羞未著花  
物華欺賤子  
草色戀貧家  
吳越山長對  
乾坤日易斜  
樓高不可望  
春事已聞蛙

花信

花信頻催景  
漸和靜看新  
綠上庭柯  
夜來幾陣風  
兼雨添得春  
流一寸多

春陰

一歲春光一半空  
鶯聲強在雨聲中  
老來言語渾多忘

病起篇章漸不工  
廣岸霧生沈獨樹  
平湖日落起寒風  
無詩無酒花開盡  
狼籍西園滿地紅

題灌畦圖

悠悠世道久離淳  
機械雖多慮轉深  
野老灌畦甘抱甕  
可憐端木未知心

把酒

把酒問春春不知  
西林遠日生煙霏  
杜鵑哀怨聲欲死  
古水流蕩光相依  
南山北山自朝暮  
今人昔人誰是非

千金一笑復何有此心久與鷗忘機

移蘭

幽蘭雜桃李開花無清香本具巖壑姿庶得韜耿光誤  
入芳園中乃覺氣不揚少年不我顧志士徒見傷偶值  
朝雨餘日吉復時良呼童斲春泥移根上高岡為爾去  
蕭艾曉露滋瀼瀼永託松竹陰爾生豈不昌細葉舒冷  
翠貞葩結青陽緩緩趨土脈慎勿近路傍路傍多輟迹  
曲曲如羊腸恐爾遭採掇委質兒女將哀哉楚靈均細

佩荷為裳斯人不可見誰能復其常遂令靡蕪輩各自  
爭芬芳回看桃李花零落空啼妝

西湖小隱

湖外風輕釀薄寒柳陰當戶晝常闌鷗羣不動水紋淡  
花氣欲流春意閒投老尚餘詩強項遣愁翻被酒辱顏  
笙歌日夜喧人耳擬卜亂雲生處山

蒿里行

春風花開春日靜看花少年色相映一朝花謝顏色衰

怕見白髮不照鏡苦口勸君君莫哀請看陌上飛塵埃  
青松白楊過丹旌挽者齊歌蒿里來人生在世無愚智  
不惜黃金爭意氣黃金用盡意氣消大力不開玄室閉  
君知生死徒離憂我知生死真浮休春風自來還自去  
野花空笑山頭路

贈歌者二首

憶曾供奉獨超羣怕問當年樂府名唱到燈詞如有感  
亂敲檀板却吞聲

一聲河滿過行雲恨逐飛花委路塵莫道樽前無淚下  
聽歌不是舊時人

晴窗

晴窗睡起岸巾紗石鼎湯喧小試茶好客不來吟思懶  
一年辜負海棠花

高樓春望

樓高詩景聚雨霽日華新芳草不知夢杜鵑空怨春寒  
暄隨節變魚鳥自情親真忝林間客蹉跎老向人



偕葛元白仇仁近訪南竺詩僧分韻得影字

花開空山春窮幽到絕頂入寺逢遠公頓覺塵慮屏遂  
作蓮社遊把酒酌龍井萬生各有態得意還自領此樂  
殊未極落日倒林影明朝下山去笑別風篁嶺

夜歸

歸杖下山遲喚舟尋渡口霧黑迷遠近篙子不停手湖  
空菰蒲響脈脈水光走吾廬傍漁燈髣髴認高柳到家  
及初更呼童買鄰酒酒酣詩興發明月入窗牖出門看

月明中天垂北斗

憶春三首

斷畦零落薺花明  
雨過平湖水漸生  
坐久忽思春去遠  
綠陰濃淡隱啼鶯

晴林紫笋出泥肥  
又見青梅似彈垂  
慚愧閒門無一事  
光陰換得幾聯詩

岸柳分陰合小橋  
杖藜徐步認鳴蜩  
山雞來往渾馴熟  
啄盡闌邊半夏苗

自詠

四友亡來懶結交，芥舟只合置堂坳。  
青溪點易知誰識，白首探玄尚解嘲。  
小景畫成時展玩，新詩吟得自推敲。  
閉門不道春將晚，驚見殘紅褪杏梢。

吳中太伯廟

茫茫天地裏，元氣是貞魂。  
至德推三讓，無稱見獨尊。  
古今時自變，尸祝禮常存。  
再拜爐煙晚，長歌出廟門。

栽孤松為九華山鍾道士作

九華何崔嵬融結本真宰神器之所鍾雲物足瀟灑挺  
挺秦大夫獨立而不改既出衆木羣豈為豔陽待初疑  
凍蛟掉禿尾忽若山靈張偃蓋又如玄鶴歸來視城郭  
悵別人間動千載楚南靈椿浪得名茫茫天壤知何在  
流精貫浹骨欲飛風雨或致雷公怪林林紅紫索價高  
幄錦圍春闕光彩憐君令色不隨時空負才名成感慨  
留向青山閱古今為問桑田幾滄海

覓句

覓句不覺晚自吟還自酬因耽五字苦輕惹一生愁水  
落洲渚出天虛日月浮空持百年意不語對馴鷗

靖傳董高士寄百花詩集

雕搜元氣萃芳叢未覺唐人詠物工木客聽吟驚夜月  
花神無語泣春風碧雲影斷遊心處綠筆香生得句中  
見說草玄門卷靜算年事業有誰同

月蝕三首

夜半蝦蟆蝕月光衆星各自吐毫芒可憐兒女猶知畏

擊瓦敲磚鬧下方

口誦黃庭內外篇  
堦前再拜藝爐煙  
丹心既切天應鑒  
不見還光不敢眠

喜見還光漸漸盈  
紫微遙想泰階平  
癡蛛小伎何堪慮  
不減乾坤萬古明

閑居重九

零露綴白曉草根  
光離離扶筇步前庭  
自覺與世遺我  
本事耘耔肯為好爵縻  
秋風淒以厲九日忽及茲  
手把

東籬菊口誦淵明詩南山祗南山彼此俱一時俛仰成  
古今況隔千載期悠悠大方中精氣暫聚之君遠我徒  
思我思君豈知終然任天運君言不吾欺

積雪

凍雲晴已散濛密聚觚稜寒日照不化晚風吹更凝空  
光映書幌勁氣逼吟燈最愛南山寺浮屠白五層

鷺雛

頂絲未長雪毳毳第一橋邊買得來已覺今朝籠不住

見人側腦却相猜

除夕

白日無停光歲蛇行赴壑出門眺夕景慨念今非昨舊  
俗照庭燎餘輝散城郭貧家閉門坐富家自張樂貧富  
不相侔造物竟何託貧家無忌諱但被愁苦縛富家氣  
焰高舉止動成錯山人無一事塊坐甘寂寞青山遶屋  
頭梅花滿籬落豈無樽中酒可以自斟酌醉卧北窗下  
此意甚不惡明朝望春來尋詩上江閣



和王琴川見寄韻

結茅我住西湖濱聞君海內詩有神遂懷昔日謫仙人  
大笑愚下如沙塵筆驅物色驟回薄隱約松聲轉萬壑  
壯心忽覺秋氣索抱琴莫負林泉約猶勝讐書天祿閣  
令威本是遼城鶴

喜陳子振至二首

兩三年不見詩仙白日追思夜廢眠及至相逢無一事  
桂花狼籍石池邊

憶昔接歡詩酒裏恨君容易上歸船別來若問吟多少  
潦倒情懷不似前

挽葛秀才二首

半生門不出居市似居山自負詩書力肯低塵土顏夢  
回蝴蝶化原冷鵲鴝閒曉雨飛丹旆思君不可攀

桑梓彫零盡耆儒獨數君天邊不獻賦地下忽修文恨  
接笑言晚還悲生死分奠芻空有淚歸洒嶺頭雲

吟雪二首

桑戶絃歌冷似冰子輿今日更無人莫嫌林下多牢落  
簷外歌斜一樹春

四山削玉水無波冷坐孤吟意趣多未必朱門知此味  
紅爐畫閣正笙歌

野步

野色畫難染杖藜春水邊新煙榆木火遲日杏花天村  
酒傾壺濁溪魚入膾鮮人生行處樂莫負杖頭錢

春感書事

升平日日事繁華惟恨人生自有涯  
破曉簾櫳喧燕子  
新晴巷陌賣桃花  
酒中賢聖客常滿  
樂按宮商字不差  
只有東風舊時柳  
依前飛絮滿鄰家

辨真幻

葉公駭真龍  
裴旻畏真虎  
舉世不識真  
大偽滋回互  
天地假我形  
起滅為誰故  
羣幻蔽一真  
奈何不知顧我心  
真獨存  
動觸羣幻怒  
急流多躁聲  
層巔無坦步  
疇能逆  
常期巧琢喪  
純素取實去  
其華吾當事  
斯語

客思

行止皆難定江山信有涯平生不識路垂老始離家人  
別數聲鶯春隨兩岬花中原多古意吟詠荅年華

渡揚子江

鯨波撼地紀金焦峙中流神奇裂太古挺挺雙刹浮我  
行值利涉一葉如閒鷗空光明我心毛骨寒颼颼長揖  
郭景純明朝渡揚州

舟次維揚

數幅蒲帆沂急流  
南風吹送到揚州  
封侯拜將人何在  
日照荒城舊驛樓

瓜洲渡書懷二首

離家時節正條桑  
船到瓜洲麥已黃  
見說神州好風景  
自慚無賦獻明光

一夜長淮浪拍船  
惡風疾雨不成眠  
家書寫得無人寄  
家在錢塘湖水邊

邳州言懷二首

戰骨銷沈水氣清沙邊砲石尚縱橫不知天定安危計  
虛使生靈死亂兵

昔日旌旗古戍秋將軍曾此覓封侯如今戰地成耕地  
得見升平任白頭

徐州寫望

舟人云州有三百六十山四時無草木樊噲墓  
凡七處莫知孰是

三百六十徐州山骨立天風不受寒樊侯古塚七抔土

飛沙野蔓斜陽殘舟人指點向余說側望淹留寸心切  
欲酌清樽弔古祠衮衮長河流不歇

新州道中

風沙渺渺客聯鑣時拂吟鞭慰寂寥車道綠緣酸棗樹  
野田青蔓苦瓜苗杜陵老去家何在阮籍愁來氣不驕  
自笑閒人閒未得得閒終合隱漁樵

魯中

遠山忽已近近山忽已遠一山復一山使我情繾綣平



野莽無人飛沙垢顏臉如何大暑月旅食備艱險古人  
亦有言富貴非所願休影不息陰望道未之見曷月予  
還歸飽食故山覓

東平道中

征途擾擾風沙黃征人下馬坐路傍此邦之人重遠客  
出門問我來何方笑言酬答未及已急呼兒女傾壺漿  
青山堂堂日車轉老樹盤陰杜鵑晚引程驛吏莫漫催  
我有新詩自排遣感君義氣真可憐回首孤城暮煙遠

望岳

驅車魯東門遙遙望泰山遠勢儼崇大真宰司其間稽  
首致心語我行良已艱親舍白雲下往轍何時還願言  
克相之造化終無端

汶上即事

北闕言別柳飛綿記得離家月又圓華髮流年身半百  
黃塵足馬路三千戍兵自累餽糧送津吏遙迎傳驛眠  
一夜南風吹汶水古榆深巷已聞蟬

過沙河

上闕何時到鄉心日夜懸  
蹇驢車轍路羸馬夕陽天  
傳驛飢仍遠篙師老不前  
微茫燈火近沙外有人煙

御河阻風

篙師飯日午繫舟嬰兒灣  
大風揚巨浪簸蕩天地間  
怒聲若驅雷猛勢驚移山  
得失稟定數真宰炳如丹  
水宿不及村誰能慘心顏

大德辛丑五月十六日灤都棧殿朝見謹賦絕句

三首

黃道無塵帳殿深集賢引見羽衣人步虛奏徹天顏喜  
萬歲聲浮玉座春

殿中錫宴列諸王羽襪分班近御床特旨向前觀妓樂  
滿身雨露溼天香

清曉傳宣入殿門簫韶九奏進金樽教坊齊扮羣仙會  
知是天師朝至尊

開平寓舍

雨陰六月摧驕陽開平客舍白日長官街汙泥沒馬股  
出門忽似河無梁土風不解重魚鳥東鄰西舍惟烹羊  
山人肺腑疏笋氣對此頗覺神不揚昨日樓頭望遠色  
海霧不動晨光涼青山四面拱城闕龍盤虎踞爭翱翔  
乃見宸京勢宏大囊括造化吞洪荒惟甘檁木卧林壑  
豈意野服朝明光太平天子崇道德繪麗琳宇開清揚  
列仙縹緲環珮下五里十里聞天香惟皇上帝降百祥  
煌煌大業垂無疆山人歌詩忽起舞山川草木騰文章

山川悠悠望不極白雲飛去之何方故鄉親舍白雲下  
悵望山川空斷腸何當振翮附黃鵠萬里天風吹渺茫

灤都寓興

昨夜分明夢到家庭前開遍石榴花龍門不放東風過  
五月平灤雪滿沙

寄舍弟

鴈起秋雲白羈棲只恨仍心知貧易變口信遠難憑憶  
弟愁荀鶴思尊老季鷹棲遲一盃酒不語對青燈

黑山

算造黑山頭下馬馬力疲大野無行客僕夫愁渴饑草根積霜露月照光離離王孫喜我至邀我入羶帷琵琶左右動勸我金屈卮此中風俗淳頗似上古時顧慚丘壑姿心迹與世遺際此聖明代厯覽山水奇不學古行役空傷木蘭詩

為楊簡齋題空蒙圖

西湖天下奇回薄太古色春風散花柳元氣蕩空碧淡

然存天真豈為歌舞感我家本住湖水邊筆床茶竈依  
漁船振衣一別五千里為君展卷心茫然欲問吾廬在  
何處但見老木浮寒煙吾廬不可尋山川不可越人生  
行止會有時長嘯堦前望明月

開平即事

土風渾似古民物自熙熙釀酒收馳乳裁裘聚鼠皮夏  
寒綿挾舊路滑馬行遲家在千山外思歸未有期

得家信



舊業今安不天涯我索居關山萬里使鴻雁幾行書蟻  
夢秋光薄蟬吟暑氣餘三高祠下水空憶釣鱸魚

灤都旅夜二首

不語登高樓裴回日將夕涼風吹秋來萬葉謝深碧悠  
悠念遠道坐見山月出下聽城郭中歌笑雜啼泣物理  
不可窮令人長太息

黃鵠垂兩翼徒懷四海心遊子中夜起攬衣步前庭蕭  
條行天雲慘淡西風砧客愁結肺腑氣咽不能吟不吟

亦不寐歷歷寒更深

為疇齋張府卿作樵雲圖

喧寂本異軌乃知靜者心  
清晨整芒屨斧斤入山林  
擔挑煙霞氣出沒窮幽深  
終南太華長入眼蕭蕭不斷松  
濤響靜觀天地生化機  
抱膝無言坐成晚昔日會稽朱  
買臣汲汲行吟背負薪  
輕將富貴博幽意野風吹老青  
山春碧桃花底煙光暮應見仙人著碁處  
時清不用歌紫芝獨自穿雲下山去

龍門道中

八月龍門路冰霜水不波  
草枯行地鼠風冷過天鵝  
棧道行車少人家閉戶多  
殷勤策羸馬夜宿赴鵬窩

驛名

李陵臺懷古

在昔李將軍提師奮威武  
步卒五千人縱橫盡貔虎  
謀猷始欲成管敢推一語  
漢恩既未報肝膽日益苦  
豈知萬里外骨肉膏草莽  
昭帝固任賢義斷難復取  
登臺望漢地山川眇如許  
北風吹不消恨入臺下土  
我行青山

下矯首一懷古復笑秦家城彎環列遺堵惟有山上雲  
淒迷送秋雨

經懷來縣

策馬懷來縣明朝始秋節遙看東五臺三峰兩峰雪大  
野人煙稀穹廬白明滅寒風恐牛馬狐兔號古穴故山  
丹桂開念此惜玄髮

寓金臺

黃姑菴裏曉鐘聲金水河邊落日情幾許客愁禁不得

數莖白髮漸分明

得舍弟書

木葉蕭蕭下玉關書來為問幾時還  
窗前丹桂知無恙湖上白鷗應自閒  
向氏不勞愁聽笛龐公終是憶居山  
南中故老如相問莫道如今鬢欲斑

寓金臺畫西湖空蒙圖

吳雲飛燕山舒卷在所得西湖不在眼  
客子氣蕭瑟幾夕憑夢歸月暗失阡陌  
豈若隨天遊疇能縮地脈今朝

好情景木落窗影白潑墨水雲翻勾出空蒙色頓失羈  
旅愁萬里如不隔何當歸江南展卷畫江北

金臺文廟石鼓

獵碣鐫功事惘然摩娑壞石卧寒煙昌黎已道文殘缺  
又較昌黎五百年

中秋 并序

大德辛丑秋令正中客居金臺崇真道館追思  
良夜能亡慨然于時遠山亭秋長煙薄晚月行

天而流景風散野以傳聲偶賦雜言奉呈松軒

太監

憶得去年八月十五正黃昏東方擁出黃金盆湖光凝  
露滴空翠柳陰疎處羅清樽恬然數子文字飲六橋溟  
滓牽林影一聲何處雄雞鳴月輪已到栖霞嶺共言人  
世似川流有詩有酒須相酬朋吟醉卧忘爾汝氣吞十  
里菰蒲秋今年中秋去年月却向燕山照城闕素華摩  
蕩長庚精萬里清光元不別翻憶西湖看月時飛蓬聚

散真難期欲將心事寄歸夢岐路迢迢雲間之雲間之  
歸夢杳目斷神馳山高月小興來一夜不成眠還聽雞  
聲催白曉

客中長至日偶成

記得去年長至日故園梅蘂正含煙鄰家聚飲分冬酒  
稚子來需拜節錢已覺鄉愁添繡線還從雲氣卜豐年  
思歸不為荒三徑九陌黃塵懶著鞭



霞外詩集卷三